

摘藻堂四庫全書薈要

集部

欽定四庫全書薈要卷一萬九千九百四十七

集部

宋文鑑卷二十四

宋 呂祖謙 編

詩 七言律詩

和御製夏日垂釣作

徐 鉉

物茂時平日正長翠華停馭睠方塘
文竿乍拂圓荷動
潁尾時翻素荇香
睿賞只應從暇豫
聖恩寧肯間沉翔
吞舟自是貪芳餌
猶笑成湯一面張

內宴應制

曹 翰

三十年前學六韜英名嘗得預時髦曾因國難披金甲
不為家貧賣寶刀臂健尚嫌弓力軟眼明猶識陣雲高
庭前昨夜秋風起羞見團花舊戰袍

豫章胡氏華林書堂

張齊賢

一百年來煙爨同衣冠江左慕家風兒孫歌舞詩書內
鄉黨優游禮讓中孝悌筠編爭紀錄門閭天語賜褒崇
莫將六闕方朱氏

朱敬則家門孝友三
葉旌表門標六闕

葉葉蒸蒸奉始

終

春日書懷

寇準

曾讀前書笑古今，恥隨流俗信浮沉。
終期直道扶元化，敢為虛名役片心。
默坐野禽啼晝景，閉門官柳長春陰。
世間事了先須退，不待霜毛漸滿簪。

春夕偶作

趙湘

一夕衡門獨自開，雨陰深巷少塵埃。
醉醒風傍池邊起，坐久月從花上來。
何處夜歌初欲斷，四鄰春夢未知回。
因思此興無人共，時復孤吟步綠苔。

上李昉相公

王操

弱冠登龍入粉闈少年清貴古來稀
袖中詔草朝天去
頭上宮花侍宴歸
卓筆玉堂寒漏迴
捲簾池館水禽飛
三台位近猶嫌遜
閒聽秋霖憶翠微

其二

朝苑優游數十春
文章敵手更無人
對敎疏冕如僚友
下直門闌似隱淪
倚檻白雲供醉望
櫓筇黃葉落吟身
年來得意知難絕
大半門生作侍臣

溫泉

鄭文寶

潺湲如燎嶺雲陰
玉石魚龍換古今
只見開元無事久
不知貞觀用功深
籠無解語衣無雪
堆有黃沙粟有金
惆悵胡雛負恩澤
始知夷甫少經心

讀江總傳

鄭文寶

行人慵過景陽宮
宮畔離離禾黍風
庭玉有花空怨白
井蓮無步莫愁紅
吟詩功業才雖大
亡國君臣道最同
爭恐暮年歸故里
綸竿迴避釣魚翁

梅花

林逋

吟懷長恨負芳時為見梅花輒入詩
雪後園林纔半樹水邊籬落忽橫枝
人憐紅豔多應俗天與清香似有私
堪笑胡雛亦風味解將別調角中吹

小園梅花

林逋

衆芳搖落獨暄妍占盡東風向小園
疎影橫斜水清淺暗香浮動月黃昏
霜禽欲下先偷眼粉蝶如知合斷魂
幸有微吟可相狎不須檀板共金樽

晨興

魏野

夜長乞待得晨興
耽睡僮猶喚不應
燒藥爐中無宿火
讀書窓下有殘燈
臨堦短髮梳和月
傍岸衰容洗帶冰
料得巢禽翻怪訝
尋常日午起慵能

山居

留化已南山多凌零藿香芬芳襲人動或數里

丁謂

峒口清香澈海濱
四時芬馥四時春
山多綠桂憐同氣
谷有幽蘭讓後塵
草解忘憂憂底事
花能含笑笑何人

海南有含笑花

爭如彼美欽天壙
長薦芳香奉百神

民牛多疫死

水牛多自湘廣商人駢至民間賣市之以給用

楊億

南海逸風如失性東吳喘月不逢醫一元祀典古所重
九穀民天命在斯真相柅車寧致問族庖更刃亦焉施
炎神癘鬼爭為虐渡虎消蝗復是誰

漢武

楊億

蓬萊銀闕浪漫漫弱水回風欲到難光照竹宮勞夜拜
露溥金掌費朝飡力道青海求龍種死諱文成食馬肝
待詔先生齒編貝那教索米向長安

蓑衣

楊朴

軟綠揉藍著勝衣，倚船吟釣最相宜。
蒹葭影裏和煙卧，菡萏香中帶雨披。
狂脫酒家春醉後，亂堆漁舍晚晴時。
直饒紫綬金章貴，未肯輕輕博換伊。

假中示判官張寺丞王校勘

晏殊

元巳清明假未開，小園幽徑獨徘徊。
春寒不定斑斑雨，宿醉難禁艷艷杯。
無可奈何花落去，似曾相識燕歸來。
遊梁賦客多風味，莫惜青錢萬選才。

初秋宿直

晏殊

絳河星斗夜闌干，禁署沈沈閉九關。
上帝冊書羣玉府，仙人宮闕巨鰲山。
涼蟾影度秋陰薄，促漏聲來夜唱閑。
擁鼻吟多欲愁絕，嚴鐘淒斷樹烏還。

安昌侯

晏殊

蓮勺移家近七遷，魯儒章句世相傳。
關中沃壤通涇渭，堂上繁聲逐管絃。
身服儒衣同蔡義，日將卮酒對彭宣。
高墳丈五陽陵外，千古朱雲氣凜然。

偶成

石延年

力振前文覺道孤恥同流輩論榮枯動非仁義何如靜
得見機關不似無孔孟也宜輕管晏臯夔未必失唐虞
侯王重問吾何有且自低心混世儒

金鄉張氏園亭

石延年

亭館連城敵謝家四時園色闢明霞窓迎西渭封侯竹
地接東陵隱士瓜樂意相關禽對語生香不斷樹交花
縱遊會約無留事醉待參橫月落斜

首陽

夷齊在孟津諫伐紂而死于首陽其山在蒲蒲乃舜都也豈非二子之意何古之所不思

哉

石延年

遜國同來訪聖謨
適觀爭國哲言師
徒恥生湯武干戈日
寧死唐虞揖讓區
大義克身安是餓
清魂有所未應無
始終天地亡前後
名骨雖雙此行孤

喜雨

韓琦

何假嗔雷擊怒桴
默然嘉澤浹民區
經時亢隔羣心駭
數月焦熬一陣蘇
已發禾苗安在握
再生莊鮒不虞枯

須臾慰滿三農望却斂神功寂似無

寄子京

宋庠

八年三郡駕朱輪更忝鴻樞對國均老去師丹多忘事
少來之武不如人車中顧馬空能數海上逢鷗想見親
唯有弟兄歸隱志共將耕鑿報堯仁

府齋歲晏節物感人輒成拙詩上寄昭文相公樞

密太尉

宋庠

處世何常盡值才虛名高位自驚猜千重浪裏隨流出

百尺竿頭試險回
衰鬢不徒欺曉雪
孤心兼欲伴寒灰
嵩陽潁曲風煙接
已仗歸雲作隱媒

重展西湖

宋庠

綠鴨東陂已可憐
更因雲竇注西田
鑿開魚鳥忘情地
展盡江湖極目天
向夕舊灘都浸月
過寒新樹便留煙
使君直欲稱漁叟
願賜閒州不計年

書王元之畫像側

歐陽修

偶然來繼前賢迹
信矣皆如昔日言
諸縣豐登少公事

一家飽暖荷君恩想公風采常如在顧我文章不足論

名姓已光青史上壁間容貌任塵昏

公貶滁州謝上表云諸縣豐登苦無

公事一家飽暖共荷君恩

上致政太保杜相公

歐陽修

儉節清名世絕倫坐令風俗可還淳貌先年老因憂國
事與心違始乞身四海儀刑瞻舊德一樽談笑作閒人
鈴齋幸得親師席東向時容問治民

內直對月

歐陽修

禁署沉沉玉漏傳月華雲表溢金盤纖埃不隔光初滿
萬物無聲夜向闌蓮燭燒殘愁夢斷蕙爐薰歇覺衣單
水精宮鎖黃金闕故比人間分外寒

下直

歐陽修

宮柳街槐綠未齊春陰不解宿雲低輕寒漠漠侵馳謁
小雨斑斑作燕泥報國無功嗟已老歸田有約一何稽
終當自駕柴車去獨結茅廬潁水西

早朝感事

歐陽修

疎星寥落曉光微殘月蒼龍闕角西王勒爭門隨仗入
牙牌當殿報班齊羽儀雖接鴛兼鷺野性終存鹿與麋
笑殺汝陰常處士十年騎馬聽朝雞

青州書事

歐陽修

年豐千里無夜警吏退一室焚清香青春固非老者事
白日自為閒人長祿厚豈惟慙飽食俸餘仍足買輕裝
君恩天地不違物歸去行歌潁水傍

望太湖

蘇舜欽

杳杳波濤閱古今四無邊際莫知深潤通曉月為清露
氣入霜天作暝陰笠澤鱸肥人繪玉洞庭柑熟客分金
風煙觸目相招引聊為停橈一楚吟

春睡

蘇舜欽

別院簾昏掩竹扉朝醒未解接春暉身如蟬蛻一榻上
夢似楊花千里飛嗒爾暫能離世網陶然直欲見天機
此中有德堪為頌絕勝人間較是非

中秋松江新橋對月和柳令之什
蘇舜欽

月晃長江上下同畫橋橫截冷光中雲頭艷艷開金餅
水面沉沉卧彩虹佛氏解為銀色界仙家多住玉華宮
地雄景勝言不盡但欲追隨乘曉風

喜永叔安道仲儀除諫官

蔡襄

御筆新除三諫官喧然朝野盡相懽昔時流落丹心在
自古忠賢得路難好竭謀猷居帝右直須風采動朝端
世間萬事皆塵土留取功名久遠看

詠門

龍昌期

樞動本為榮辱主長因外戶細推尋乾坤出入無窮象
夷狄關防有限心拚到善人非遠大開當古道自高深
九成載舉簫韶奏穆穆無凶合在今

走筆寄夷陵歐陽永叔

謝伯初

舟行無險似瞿塘滿峽猿聲斷旅腸萬里更堪人謫宦
經年應合鬢成霜長官衫色江波綠學士文華蜀錦張
去似長沙非黜辱比於連郡亦遐荒

韓退之以言事
初貶連州令

可

能作賦嘲巫渚好為投文弔耒陽

杜子美下耒
陽路經峽

下國難

留金馬客新詩傳與竹枝娘才如夢得多為累情甚安
仁久悼亡絕境化成儒雅俗遠民爭識校讐郎典詞懸
待修青史諫草當來露皂囊不用臨流羨漁者便將纓
足濯滄浪

許昌公字書懷呈歐陽永叔韓子華王介甫

謝伯初

十年趨競浪求榮因得閒曹減宦情
亂種黃花看野景
旋移高竹聽秋聲
驅馳賤事猶干祿
約勒清狂為近名



早晚持竿釣鱸鰕雙溪煙雨一舟橫

寄杭州孫資政

唐介

何人富貴不圖安大抵為臣節欲完手執樞機謀國易
心存忠義入時難臨風未覺龍媒老衝斗誰知劍氣寒
天子聖神思舊德肯教旌馭久盤桓

讀史

王安石

自古功名亦苦辛行藏終欲付何人當時黜陟猶承誤
末俗紛紜更亂真糟粕所傳非粹美丹青難寫是精神

區區豈盡高賢意獨守千秋紙上塵

示長安君

王安石

少年離別意非輕老去相逢亦愴情
草草杯盤供笑語昏昏燈火話平生
自憐湖海三年隔又作塵沙萬里行
欲問後期何日是寄書應見鴈南征

和金陵懷古

王安石

懷鄉訪古事悠悠獨上江城滿目秋
一鳥帶煙來別渚數帆和雨下歸舟
蕭蕭暮吹驚紅葉慘慘寒雲壓舊樓

故國淒涼誰與問人心無復更風流

詳定試卷

王安石

童子常誇作賦工暮年羞悔有揚雄當時賜帛倡優等
今日論才將相中細甚客鄉因筆墨早於爾雅注魚蟲
漢家故事真當改新詠知君勝弱翁

思王逢原

王安石

蓬蒿今日想紛披冢上秋風又一吹妙質不為平世得
微言唯有故人知廬山南墮當書案湓水東來入酒卮

陳迹可憐隨手盡欲歡無復似當時

次韻元厚之平戎慶捷

王安石

朝廷今日四夷功先以招懷後殪戎邊地馬牛歸隴底
漢人煙火起湟中投戈更講諸儒藝免曹爭趨上將風
文武佐時慚吉甫宣王征伐自膚公

葛溪驛

王安石

缺月昏昏漏未央一燈明滅照秋床病身最覺風露早
歸夢不知山水長坐感歲時歌慷慨起看天地色淒涼

鳴蟬更亂行人耳正抱疎桐葉半黃

郡舍偶書

楊偕

偃息鈴齋度歲華著書人盡笑聲牙斯文自信驚天地
吾道誰知繫國家獨愛杉篁寒不變更憐江海闊無涯
因思朝市爭名地何似優游刺史衙

送唐介之貶所

李師中

直誠自許時不與孤立敢言人所難去路一身輕似葉
高名千古重於山並游英俊顏何厚已死姦雄骨尚寒

天意若為宗社計肯教夫子不生還

送唐御史

仲訥

力犯雷霆衆共危遠投魑魅獨為宜
忠州學業真無負高廟神靈固有知
自倚聖明容直道未甘憔悴死荒陲
滿朝卿相多公議莫把文章作楚詞

聞富并州入相

王令

元首賡歌樂股肱四方雖遠喜聲盈
忠賢不死天心在輔弼終歸聖慮精
中國自今應更重本朝前日可嗟輕

要須待見成堯舜未敢輕浮作頌聲

紙鳶

王令

誰作輕鳶壯遠觀似嫌飛鳥未多端纔乘一線憑風去
便有愚兒仰面看未必青霄因可到偶能終日遂為安
扶搖不起滄溟遠笑殺鵬搏似爾難

聞南陽呂諫議誨長逝

鄭獬

子文三仕去何頻一卧南陽竟沒身明主自應容直道
皇天何事殺忠臣柱天力屈空留草貫日心存不化塵

黃壤不知人世事為君慟哭楚江濱

恭和御製上元觀燈


王珪

雪消華月滿仙臺萬燭當樓寶扇開
雙鳳雲帟扶輦下
六鰲海上駕山來
鎬宮春酒霑周燕
汾水秋風陋漢材
一曲昇平人共樂

唐有聖代
昇平樂曲

君王又進紫霞杯

宋文鑑卷二十四



總校官庶吉士

臣

張能照

校對官中書

臣

胡紹基

謄錄貢生

臣

秦聯登

欽定四庫全書叢要

集部

宋文鑑卷二十七

五至

詳校官候選知縣臣吳國華



欽定四庫全書薈要卷一萬九千九百四十八

集部

宋文鑑卷二十五

宋 呂祖謙 編

詩 七言律詩

閒居吟

邵 雍

閒居須是洛中居天下閒居皆莫如文物四方賢俊地
山川千古帝王都絕奇花畔持芳醕最軟草間移小車
只有堯夫負親舊交親元不負堯夫

仁者

邵 雍

仁者難逢思有常平居切勿恃何妨爭先路徑機關惡
近後語言滋味長爽口物多須作疾快心事過必為傷
與其病後能求藥不若病前能自防

清風短吟

邵雍

清風興味未全衰豈謂天心便棄遺長具齋莊緣讀易
每慙疎散為吟詩人間好景皆輸眼世上閒愁不到眉
生長太平無事日又還身老太平時

閒行吟

邵雍

長憶當年掃弊廬未嘗三徑草荒蕪欲為天下屠龍手
肯讀人間非聖書否泰悟來知進退乾坤見了識親疎
自從會得環中意閒氣胸中一點無

洛下園池

邵雍

洛下園池不閉門洞天休用別尋春縱游只却輸閒客
遍入何嘗問主人更小亭欄花自好儘荒臺榭景纔真
虛名誤了無涯事未必虛名總到身

答人語名教

邵雍

開闢而來世教數其間雄者號真儒修身有道名先覺
何代無人達奧區煥若丹青經史義明如日月聖人途
鯁生涵泳雖云久天下英才敢厚誣

何事吟

邵雍

何事教人用意深出塵此字索沉吟施為欲似千鈞弩
磨礪當如百鍊金釣水誤持生殺柄著碁閒動戰爭心
一杯美酒聊康濟林下時時或自斟

觀三皇

邵雍

許大乾坤自我宣乾坤之外更何言初分大道非常道
纔有先天未後天作法極微難著跡收功最久不知年
若教世上論勲業料得更無人在前

觀五帝

邵雍

進退肯將天下讓着何言語狀雍容衣裳垂處威儀盛
玉帛修時意思恭物物盡能循至理人人自願立殊功
當時何故得如此只被聲名類日中

觀三王

邵雍

一片中原萬里餘，殆非孱德所宜居。
夏商正朔猶能布，湯武干戈未便驅。
澤火有名方受草，水天無應不成需。
請觀仁義為心者，肯作人間淺丈夫。

觀五伯

邵雍

刻意尊名名愈虧，人人奔命不勝疲。
生靈劒戟林中活，公道貨財心裏歸。
雖則餽羊能愛禮，奈何鳴鳳未來儀。
東周五百餘年內，歎息惟聞一仲尼。

觀七國

邵雍

當其末路尚縱橫仁義之言固不聽肯謂破齊存即墨
能勝坑趙盡長平清晨見鬼未為怪白日殺人奚足驚
加以蘇張掉三寸扼喉其勢不俱生

觀高麗秦

邵雍

車轉車轉七國正爭籌利害相磨未便休比至一雄心底定
其如四海血橫流三千賓客方成夢百二山河又變秋
謾說罷侯能置守趙高元不是封侯

觀兩漢

邵雍

秦破山河舊戰場
豈期民復見耕桑
九千來里開封域
四百餘年號帝王
剝喪既而遭莽卓
經營殊不念高光
當時文物如斯盛
城復何由更有隍

觀三國

邵雍

桓桓鼎峙震雷音
絕唱高蹤沒處尋
簫鼓一方情未暢
弓刀萬里力難任
論兵很石寧無意
飲馬黃河徒有心
雖曰天時亦人事
誰知慮外失良金

觀西晉

邵雍

承平未必便無憂安若忘危非善謀題品人才憑雅誚
雌黃時事用風流有刀難剖公閭腹無木可梟元海頭
禍在夕陽亭一句上東門嘯浪悠悠

觀十六國

邵雍

溥天之下號寰區大禹曾經治水餘衣到敝時多蟣虱
瓜當爛後足蟲蛆龍章本不資狂寇象魏何嘗薦亂胡
尼父有言堪味處當時欠一管夷吾

觀南北朝

邵雍

方其天下分南北聘使何嘗絕往還偏霸尚存前典憲
小康猶帶舊腥羶洛陽雅望稱崔浩江表奇才服謝安
二百四年能並轡謾將夷虜互為言

觀隋

邵雍

始謀當日已非臧又更相承或自戕螻蟻人民貪土地
泥沙金帛悅姬姜征遼意思縻荒服泛汴情懷厭未央
三十六年都掃地不然天下未歸唐

觀有唐

邵雍

天生神武奠中央不爾羣兇未易攘貞觀若無風凜凜
開元安得氣揚揚凭高始見山河壯入夏方知日月長
三百年間能混一事雖成往道彌光

觀五代

邵雍

自從唐季墜皇綱天下生靈被擾攘社稷安危懸卒伍
朝廷輕重繫藩方深冬寒木固不脫未旦小星猶有光
五十三年更五姓始知除掃待真王

觀盛化

邵雍

紛紛五代亂離間，一旦雲開復見天。
草木百年新雨露，車書萬里舊山川。
尋常巷陌猶簪紱，取次園林亦管絃。
人老太平春未老，鶯花無害日高眠。

吾曹養拙賴明時，為幸居多寧不知。
天下英才中遁跡，人間好景處閒眉。
生來只慣見豐稔，老去未嘗經亂離。
五事歷將前代舉，帝堯而下更無之。

一事革命之日，市不易肆，二事克服。

天下在即位後三事未嘗殺一無罪四事百年方四葉五事百年無腹心之患也。

問調鼎

邵雍

請將調鼎問於君調鼎工夫敢與聞只有鹽梅難盡善
豈無薑桂助為辛和羹必欲須求美衆口如何更得均
切勿輕言天下事伊周殊不是庸人

安樂窩

邵雍

安樂窩中三月期老來纔會惜芳菲自知一賞有分付
誰讓萬金無子遺美酒飲教微醉後好花看到半開時
這般意思難名狀只恐人間都未知

自詠

邵雍

老去無成齒髮衰年將七十待何為居常無病不服藥
間或有懷時作詩引水更憐魚並至折花仍喜蝶相隨
平生積學都無效只得胸中惡坦夷

首尾吟

邵雍

堯夫非是愛吟詩為見聖賢興有時日月星辰堯則了
江河淮濟禹平之皇王帝霸經褒貶雪月風花未品題
豈謂古人無闕典堯夫非是愛吟詩

堯夫非是愛吟詩詩是堯夫處困時事體極時觀道妙

人情盡處看天機
孝慈親和未必見
松柏歲寒然後知
匪石未聞心可轉
堯夫非是愛吟詩

堯夫非是愛吟詩
詩是堯夫自試時
事體待諳然後信
人情非久莫能知
同霑雨露蓬蒿所
獨出雪霜松柏姿
見慣不如身歷過
堯夫非是愛吟詩

堯夫非是愛吟詩
詩是閒觀蔬圃時
暖地春初纔蒨鬱
宿根秋末却披離
茱萸蒜薹青遮隴
蘆芋薑蕞綠滿畦
時到皆能美精彩
堯夫非是愛吟詩

堯夫非是愛吟詩詩是堯夫不強為事到強為須涉跡
人能知止是先機面前自有好田地天下豈無平路歧
省力事多人不做堯夫非是愛吟詩

堯夫非是愛吟詩詩是堯夫重惜時西晉浮誇時可歎
南梁崇尚事堪悲仲尼豈欲輕辭魯孟子何嘗便去齊
儀鳳不來人老去堯夫非是愛吟詩

堯夫非是愛吟詩詩是精神未耗時水竹清閒都占了
鶯花富貴又兼之梧桐月向懷中照楊柳風來面上吹

被有許多閒捧擁堯夫非是愛吟詩

蒼蒼吟寄李審言

邵雍

一般顏色正蒼蒼今古人曾望斷腸日往月來無少異
陽舒陰慘不相妨迅雷震後山川裂甘露零時草木香
幽暗巖崖生鬼魅清平郊野見鸞凰千花爛為三春雨
萬木凋因一夜霜此意分明難理會直須賢者入消詳

林下

邵雍

老年軀體索溫存安樂窩中別有春萬事去心閒偃仰

四支由我任舒伸
庭花盛處涼鋪簟
簷雪飛時軟布裯
誰道山翁拙於用
也能康濟自家身

安樂四吟

邵雍

詩

安樂窩中詩一編
自歌自詠自怡然
陶鎔水石閒勲業
銓擇風花靜事權
意去乍乘千里馬
興來初上九重天
歡時更改三兩字
醉後吟哦六七篇
直恐心通雲外月
又疑身是洞中仙
銀河洶湧翻晴浪
玉樹查牙生紫煙

萬物有情皆可狀百骸無病不能蠲命題濫被神相助
得句謬為人所傳肯讓貴家常奏樂寧慙富室賸收錢
若條此過知何限因甚臺官獨未言

書

安樂窩中一部書號云皇極意何如春秋禮樂能遺則
父子君臣可廢乎浩浩義軒開闢後巍巍堯舜協和初
炎炎湯武干戈外洵洵桓文弓劍餘日月星辰高照耀
皇王帝霸大鋪舒幾千百王出規制數億萬年成楷模

治久便憂強跋扈患深仍念惡驅除才堪命世有時有
智可濟時無世無既往盡歸閒指點未來須俟別支梧
不知造化誰為主生得幾多奇丈夫

香

安樂窩中一炷香凌晨焚意豈尋常禍如許免人須諂
福若待求天可量且異緇黃徼廟貌又殊兒女裛衣裳
中孚起信寧煩禱元妄生災未易禳虛室清明都是白
靈臺瑩靜別生光觀風禦寇心方醉對境顏淵坐正忘

赤水有珠涵造化泥丸無物隔青蒼生為男子仍身健
時遇昌辰更歲穰日月照臨光自大君臣庇蔭效何長
不圖聞道至於此金玉誰家不滿堂

酒

安樂窩中酒一樽非惟養氣又頤真頻頻到口微成醉
拍拍滿懷都是春何異君臣初際會又同天下網緼
醺酣情味難名狀醞釀功夫莫指陳斟有淺深存燮理
飲無多少寄經綸鳳凰樓下逍遙客郊廓城中自在人

高閣望時花似錦
小車行處草如茵
卷舒萬古興亡手
出入千重雲水身
雨後靜觀山意思
風前閒看月精神
這般事體權衡別
振古英豪恐未聞

自和打乖吟

邵雍

安樂窩中好打乖
自知元沒出人才
老年多病不服藥
少日壯心都已灰
庭草剗除終未盡
檻花擡舉尚難開
輕風吹動半醺酒
此樂真從天外來

題華下無相院西溪

張先

積水涵虛上下清
幾家門靜岸痕平
浮萍破處見山影
小艇歸時聞草聲
入郭僧尋塵裏去
過橋人似鑑中行
已憑暫雨添秋色
莫放修蘆礙目生

寄李朝請

范純仁

仕逾三黜信多艱
名節常憂不自完
幸賴聖明寬罪戾
敢辭閑僻盡盤桓
益生墜甑何能顧
貢氏塵冠豈復彈
俸入雖貧家世事
釜魚從此已稱丹

郊行即事

程顥

芳原綠野恣行時
春入遙山碧四圍
興逐亂紅穿柳巷
困臨流水坐苔磯
莫辭盞酒十分醉
只恐風花一片飛
況是清明好天氣
不妨游衍莫忘歸

秋日偶成

程顥

閑來無事不從容
睡覺東窗日已紅
萬物靜觀皆自得
四時佳興與人同
道通天地有形外
思入雲煙變態中
富貴不淫貧賤樂
男兒到此是豪雄

出潁口初見淮山

蘇軾

我行日夜向江海，楓葉蘆花秋興長。
平淮忽迷天遠近，青山久與船低昂。
壽州已見白石塔，短棹未轉黃茅岡。
波平風軟望不到，故人久立煙蒼茫。

新城道中

蘇軾

東風知我欲山行，吹斷簷間積雨聲。
嶺上晴雲披絮帽，樹頭初日掛銅鉦。
野桃含笑竹籬短，溪柳自搖沙水清。
西崦人家應最樂，煮芹燒筍餉春耕。

和王旂

蘇軾

異時長恠謫仙人舌有風雷筆有神聞道騎鯨遊汗漫
憶曾捫蝨話悲辛氣吞餘子無全目詩到諸郎尚絕倫
白髮故交空掩卷淚河東注問蒼旻

次韻李修孺留別

蘇軾

十年流落敢言歸魚鳥江湖只自知豈意青天掃雲霧
盡呼黃髮寄安危風流吾子真前輩人物他年記一時
我欲折繻留此老緇衣誰作好賢詩

卧病逾月請郡不許復直玉堂十一月一日鑠院

是日苦寒詔賜官燭法酒書呈同院

蘇軾

微霰踈踈點玉堂
詞頭夜下攬衣忙
分光御燭星辰爛
拜賜宮壺雨露香
醉眼有花書字大
老人無睡漏聲長
何時却逐桑榆暖
社酒寒燈樂未央

和劉景文見贈

蘇軾

元龍本志陋曹吳
豪氣崢嶸老不除
失路今為噲等伍
作詩猶似建安初
西來為我風飄面
獨卧無人雪滿廬

留子非為十日飲要令安世誦亡書

王文玉挽詞

蘇軾

才名誰似廣文寒月斧雲斤琢肺肝玄晏一生都卧病
子雲三世不遷官幽蘭空覺香風在宿草何曾淚葉乾
猶喜諸郎有曹志文章還復富波瀾

雪後書北臺壁二首

蘇軾

黃昏猶作雨纖纖夜靜無風勢轉嚴但覺衾裯如潑水
不知庭院已堆鹽五更曉色來書幌半月寒聲落畫簷

試掃北臺看馬耳未隨埋沒有雙尖

城頭初日始翻鴉陌上晴泥已沒車凍合玉樓寒起粟
光搖銀海眩生花遺蝗入地應千尺宿麥連雲有幾家
老病自嗟詩力退空吟冰柱憶劉叉

往岐亭郡人潘古郭三人送余於女王城東禪莊
院

蘇軾

十日春寒不出門不知江柳已搖村稍聞泱泱流水谷
盡放青青沒燒痕數畝荒園留我住半鉗濁酒待君溫

去年今日關山路細雨梅花正斷魂

姪安節遠來夜坐

蘇軾

南來不覺歲崢嶸坐撥寒灰聽雨聲遮眼文書元不讀
伴人燈火亦多情嗟予潦倒無歸日令汝蹉跎已半生
免使韓公悲世事白頭還對短燈檠

祭常山回小獵

蘇軾

青蓋前頭點皂旗黃茅岡下出長圍弄風驕馬跑空立
趨兔蒼鷹掠地飛回望白雲生翠巘歸來紅葉滿征衣

聖朝若用西涼簿白羽猶能効一揮

次韻穆父尚書侍祠郊丘瞻望天光退而相慶引

滿醉吟

蘇軾

千章杞梓蔭雲天
樗散誰收老鄭虔
喜氣到君浮白裏
豐年及我掛冠前
令嚴鐘鼓三更月
野宿貔貅萬竈煙
太息何人知帝力
歸來金帛看駢肩

樂全先生生日以鐵拄杖為壽
蘇軾

二年相伴影隨身
踏遍江湖草木春
擿石舊痕猶作眼

閉門高節欲生鱗畏塗自衛真無敵捷徑爭先却累人
遠寄知公不嫌重筆端猶自幹千鈞

新釀桂酒

蘇軾

擣香篩辣入餅盆盎盎春溪帶雨渾收拾小山藏社甕
招呼明月到芳樽酒材已遣門生致菜把仍叨地主恩
爛煮葵羹斟桂醕風流可惜在蠻村

連雨江漲二首

蘇軾

越井岡頭雲出山牂牁江上水如天牀牀避漏幽人屋

浦浦移家艇子船
龍卷魚鰕并雨落
人隨雞犬上墻眠
祇因樓下平堦水
長記先生過嶺年

急雨蕭蕭作晚涼
卧聞榕葉響長廊
微明燈火耿殘夢
半濕簾帷浥舊香
高浪隱牀吹甕瓦
盞間風驚樹擺琳
琅先生不出晴無
用留向空堦滴夜
長

枕榔杖寄張文潛
時初聞黃魯直遷
黔南范淳父
九疑也
蘇軾

睡起風清酒在亡
身隨殘夢雨茫茫
江邊曳杖枕榔瘦

林下尋苗蕐撥香獨步儻逢勾漏令遠來莫恨曲江張
遙知魯國真男子獨憶平生盛孝章

夜坐達曉寄子由

蘇軾

燈燼不挑垂暗檠爐香重撥上餘薰清風欲發鴉翻樹
缺月初升犬吠雲閉眼此心新活計隨身孤影舊知聞
雷州別乘應危坐跨海幽光與子分

六月二十日夜渡海

蘇軾

參橫斗轉欲三更苦雨終風也解晴雲散月明誰點綴

天容海色本澄清空餘魯叟乘桴意粗識軒轅奏樂聲
九死南荒吾不恨茲游奇絕冠平生

潤州甘露寺

沈括

丞相高齋半草萊舊時風月滿亭臺地從日月生時見
眼到江山盡處回三國是非春夢斷六朝城闕野花開
心隨潮水漫漫去流徧煙村半日來

感秋扇

蘇轍

團扇經秋似敗荷丹青髣髴舊松蘿一時用舍非吾事

舉世炎涼奈爾何
漢代誰令收汲黯
趙人猶復用廉頗
心知懷袖非安處
重見秋風愧恨多

寄黃幾復

黃庭堅

我居北海君南海
寄鴈傳書謝不能
桃李春風一杯酒
江湖夜雨十年燈
持家但有四立壁
治病不蘄三折肱
想得讀書頭已白
隔溪猿哭瘴煙藤

寄上叔父夷仲

黃庭堅

艱難聞道有歸音
部曲霜行壁月沉
王春正月調玉燭

使星萬里朝天心頗令山海藏國用乃見縣官恤民深
經心隴蜀封疆守必有人材備訪尋

詠雪

黃庭堅

春寒晴碧來飛雪忽憶江清水見沙夜聽疎疎還密密
曉看整整復斜斜風回共作婆娑舞天巧能開頃刻花
政使盡情寒至骨不妨桃李用年華

新喻道中寄元明

黃庭堅

中年畏病不舉酒孤負東來數百觴喚客煎茶山店遠

看人秧稻午風涼但知家裏俱無恙不用書來細作行
一百八盤携手上至今猶夢遶羊腸

壺中九華

黃庭堅

湖口人李正臣蓄異石九峰東坡先生名曰壺中九
華并為作詩後八年自海外歸過湖口石已為好事
者所取乃和前篇以為笑實建中靖國元年四月十
六日明年當崇寧之元五月二十日庭堅繫舟湖口
李正臣持此詩來石既不可復見東坡亦下世矣感

歎不足因次前韻

有人夜半持山去頓覺浮嵐暝翠空試問安排華屋處
何如零落亂雲中能迴趙壁人安在已入南柯夢不通
賴有霜鐘難席卷袖椎來聽響玲瓏

郊丘從駕

彭汝礪

今歲郊丘上始躬宿齋初出未央宮百年禮樂星辰爛
萬國衣冠錦繡中精意與天相應接人心如水自流通
聖時好作休成記今日誰為太史公

喜聞中丞包公稱職有書

楊蟠

薛宣執法動朝廷丙魏如今亦有聲公道未亡猶可立
世人不慣却須驚幅員潤澤嘉謀進臺閣風流故事明
時論已兼言責重莫教天下笑虛名

陪潤州裴如晦學士遊金山回作 楊蟠

世上蓬萊第幾洲長雲漠漠鳥飛愁海山亂點當軒出
江水中分遶檻流天遠樓臺橫北固夜深燈火見揚州
迴船却望金陵月獨倚牙旗坐浪頭

示諸君

徐積

古俗今時不用分，只將虛實判澆淳。
養心有要先除偽，入德無難只用真。
此道若從為得路，他岐如往是迷津。
我曹好尚雖迂闊，最愛山夫共野人。

次韻寇秀才寄下邳家兄

陳師道

少共千憂老一官，中間毀譽兩茫然。
去留有命真如此，俯仰從人却未然。
故看江山供極目，正將强健入新年。
驚逢小杜風流勝，信有衣冠不乏賢。

次韻春懷

陳師道

老形已具臂膝痛春事無多櫻笋來敗絮不溫生蟣虱
大杯覆酒着塵埃衰年此日乃為客舊國當時只廢臺
河嶺尚堪供極目少年為句未須哀

東山謁外大父墓

陳師道

土山宛轉屈蒼龍下有槃槃一老翁萬木刺天元自直
叢篁侵道更須東百年富貴只此見一代功名託至公
少日拊頭期類我莫年垂淚向西風

寄泰州曾侍郎

陳師道

八年門第故違離，千里河山費夢思。
淮海風濤真有道，麒麟圖畫豈無時。
今朝有客傳河尹，是處逢人說項斯。
三徑未成心已具，世間惟有白鷗知。

夏日二首

張耒

長夏村墟風日清，簷牙燕雀已生成。
蝶衣曬粉花枝午，蛛網添絲屋角晴。
落落疎簾邀月影，嘈嘈虛枕納溪聲。
久判兩鬢如霜雪，直欲漁樵過此生。

棗徑瓜畦經雨涼
白衫烏帽野人裝
幽花避日房房斂
翠樹含風葉葉涼
養拙久判藏姓字
致身安事巧文章
漢庭卿相皆豪傑
不遇何妨白髮郎

元日

任伯雨

憶昔東班賀紫宸
和風佳氣淨無塵
龍墀初下觚稜日
雉扇齊開玉座春
接武九霄曾近侍
投荒三載作流人
窮通忤合雖天理
俯仰尋思不為身

聞趙正夫遷門下

鄒浩

促膝論心十二年有時忠憤淚潜然不聞一事拳拳救
但見三臺每每遷天地豈容將計免國家能報乃身全
它時會有相逢日解說何由復自賢

旅中諭懷

俞紫芝

白浪紅塵二十春就中奔走費光陰有時俗事不稱意
無限好山都上心一面琴為方外友數篇詩當橐中金
會須將爾同歸去家在碧溪煙樹深

寄蘇內翰

劉季孫

倦壓鰲頭請左符笑尋潁尾為西湖二三賢守去非遠
六一清風今不孤四海共知霜鬢滿重陽曾插菊花無
聚星堂上誰先到欲傍金樽倒玉壺

望舊廬有感

葉濤

重來舊屋誰為主江令蕭條歎獨存已愧問人纔識路
更悲無柳可知門舟車到處成家宅歲月惟驚長子孫
孤客濫巾非得已故交零落與誰論

江令尋宅詩云見
桐猶識井看柳尚

知門

題半隱堂

劉跂

一堂圖籍自陶冶三逕蕭蘭俱歲華定非平恩許侯宅
會是仲長公理家端居雅不煩屏當佳設頗嘗成咄嗟
唯我身閑數來往微絃一泛即生涯

晚登秋屏閣示杜氏兄弟

洪朋

病人湯熨暫時停謾向秋屏臺上行白日忽隨飛鳥去
青山斷處落霞明林間嘒嘒寒蟬急江上悠悠煙艇橫
富貴功名付公等嗟予老矣負平生

答王立之惠書

潘大臨

歸自江南即定居謾勞親友問何如剛腸肯為藜羹轉
病骨聊憑竹杖扶南圃土腴千樹橘東湖春水百金魚
明年生計應堪說待倩君侯買異書

望西山懷駒父

李彭

去歲湖湘賦凜秋聞君江國大刀頭百年會面知幾遇
十事欲言還九休照眼遙岑落懷袖過眉拄杖立汀洲
莫言青山淡吾慮誰料却能生許愁

簡田升之時升之赴金陵

吳則禮

建業風流端可憐
石城江色曉鮮鮮
鳥窺漢節梅花底
雨濕柂樓春水邊
霜髮雖言書有東
觀錦囊覓句屬南
天
枯腸不飽大官肉
我種芋魁今十年

病後登快哉亭

賀鑄

經雨清蟬得意鳴
紅塵開處見歸程
病來把酒不知厭
夢後倚樓無限情
鷗帶殘枝投古剎
草將野色入荒城
故園又負黃華約
但覺秋風鬢上生



宋文鑑卷二十五

欽定四庫全書薈要卷一萬九千九百四十九

集部

宋文鑑卷二十六

宋 呂祖謙 編

詩 五言絕句

松江夜泊

鮑當

舟閑人已息林際月微明
一片清江水中涵萬古情

孤鴈

鮑當

寒多稻糧少萬里孤難進
不惜充君庖為帶邊庭信

江上漁者

范仲淹

江上往來人但愛鱸魚美君看一葉舟出沒風波裏

淮上遇風

范仲淹

一棹危於葉傍觀亦損神他時在平地無忽險中人

出守桐廬道中十首

范仲淹

隴上帶經人金門齒諫臣雷霆日有犯始可報吾親

其二

君恩泰山重爾命鴻毛輕一意懼千古敢懷妻子榮

其三

妻子屢牽衣出門投禍機寧知白日照猶得虎符歸

其四

分符江外去人笑似騷人不道鱸魚美還堪養病身

其五

有病甘長廢無機苦直言江山藏拙好何敢望天閭

其六

天閭變化地所好必真龍軻意正迂濶悠然輕萬鍾

其七

萬鍾誰不慕意氣滿堂金必若枉此道傷哉非素心

其八

素心愛雲水此日東南行笑解塵纓處滄浪無限情

其九

滄浪清可愛白鳥鑑中飛不信有中落風塵化客衣

其十

風塵日已遠郡枕子陵溪始見神龜樂優優尾在泥

無絃琴

王琪

寂寞之淳音其為樂至深應嫌鼓腹者獨是撫絃琴

遠山

歐陽修

山色無遠近看山終日行峰巒隨處改行客不知名

夏夜小亭有懷

梅堯臣

西南雨氣濃林上昏月色寒影不隨人寥寥空露白

寒草

梅堯臣

寒草纔變枯陳根已含綠始知天地仁誰道風霜酷

芳草

王安石

芳草知誰種緣階已數叢無心與時競何苦綠葱葱

送望之赴臨江

王安石

黃雀有頭顱長行萬里餘想因君出守暫得免包苴

溝港

王安石

溝港重重柳山坡處處梅小輿穿麥過狹徑礙桑回

梅花

王安石

墻角數枝梅凌寒獨自開遙知不是雪為有暗香來

歲寒

邵雍

松栢入冬殘方能見歲寒聲
湏風裏聽色更雪中看

廬山三首

蘇軾

青山若無素偃蹇不相親
要識廬山面他年是故人

其二

自昔懷清賞神游杳靄間
如今不是夢真箇是廬山

其三

芒鞋青竹杖自掛百錢游
頗怪深山裏人人識故侯

蝸牛

蘇軾

腥涎不滿殼聊足以自濡升高不知回竟作黏壁枯

讀史

蘇轍

江河浪如屋要須滄海容可憐狄仁傑猶復負婁公

遺老齋三首

蘇轍

久無叩門聲啄啄問何故田中有人至昨夜盈尺雨

其二

避事已謝客養性不看書書中多感遇掩卷輒長吁

其三

人言里中舊獨有陳太丘文若命世人惜哉憂人憂

陪謝師厚遊百花洲槃礴范文正公祠下道羊曇
哭謝安事因讀生存華屋處零落歸山丘為韻

黃庭堅

憶在昭陵日傾心用老成功歸仁祖廟政得一書生

其二

羊生但著鞭勿哭西州門故有不亡者南山相與存

其三

慶州自不惡籍甚載聲華忠義無可憾公今有世家

其四

公歸未百年鶴巢荒古屋我吟殄瘁詩悲風韻喬木

其五

傷心祠下宇在時公燕處臨水不相猜江鷗會人語

其六

公有一杯酒與人同醉醒遺民能記憶欲語涕飄零

其七

妾徑問謠俗高丘省
佃作昔遊非苟然
今花幾開落
其八

在昔實方枘成功見圓機
九原尚友心白首要同歸
其九

人去洲渚在春回
花草斑清談值淵對發興如江山
其十

落日銜城壁祠東更一遊
悲來惜酒少安得董糟丘
謫居黔南五首

黃庭堅

相望六千里天地隔江山十書九不到何用一開顏

其二

霜降水反壑風落木歸山冉冉歲華晚昆蟲皆閉關

其三

冷淡病心情暄和好時節故園音信斷遠郡親賓絕

其四

山郭燈火稀峽天星漢少年光東流水生計南枝鳥

其五

冥性齊遠近委順隨南北歸去誠可憐天涯住亦得

蠶婦

張俞

昨日到城郭歸來淚滿巾遍身羅綺者不是養蠶人

秦王纜船石

楊蟠

色陰長帶雨疑是白雲根欲問東巡事今猶不敢言

紈扇

張舜民

紈扇本招風曾將熱時用秋來掛壁上却被風吹動

鴈

陳師道

來往違寒暑飛鳴在稻梁未知溟海大不肯過衡陽

春日

崔鷗

落日不可盡丹林紫谷開明明遠色裏歷歷暝鴉回

題績溪雪峰樓

崔鷗

題詩最高處不為付人看記著今朝勝山明松雪寒

歲暮書堂

汪革

霜重堦鋪紈風凜肌生粟心莊耳目清思慮無由俗

長安在何許二首

賀鑄

長安在何許疑在青天上
矯首遡西風浮雲斷人望

又

長安在何許疑在白日下
徘徊天一隅華月生新夜
六言

題舒州山谷寺石牛洞

王安石

水泠泠而北出山靡靡而旁圍
欲窮源而不得竟悵望以空歸

題西太一宮

王安石

柳葉鳴蜩綠暗荷花落日紅酣三十六陂煙水白頭想
見江南

四賢吟

邵雍

彥國之言鋪陳晦叔之言簡當君實之言優游伯淳之
言條暢四賢洛陽之望是以在人之上有宋熙寧之間
大為一時之壯

獨坐

文同

不報門前賓客已收案上文書獨坐水邊林下宛如故

里閑居

相如

文同

相如何必稱病靖節奚須去官就下其誰不許如愚是處皆安

鷺鷥

文同

避雨竹間點點迎風柳下翻翻靜依寒蔦如畫獨立晴沙可憐

題鄭防畫夾三首

黃庭堅

子母猿啼檨葉山
南山北危機世故誰能樗里穀中皆
是由基

惠崇煙雨歸鴈坐我瀟湘洞庭欲喚扁舟歸去故人言
是丹青

折葦枯荷共晚紅
榴苦竹同時睡
鴨不知飄雪寒
雀四顧風枝

蟻蝶圖

黃庭堅

蝴蝶雙飛得意偶然畢
命網羅羣蟻爭收墜
翼策勲歸

去南柯

有惠江南帳中香者戲作

黃庭堅

螺甲割崑崙耳香材屑鷓鴣斑欲雨鳴鳩日永下帷睡
鴨春閒

子瞻繼和復答

黃庭堅

迎燕溫風旒旒潤花小雨斑斑一炷煙中得意九衢塵
裏偷閒

和高子勉

黃庭堅

句法俊逸清新詞源廣大精神建安數六七子開元纔
兩三人

登山望海

張耒

鳥去蒼煙古木人歸綠野孤舟信美雖非吾土消憂且
復登樓

寧浦書事

秦觀

揮汗讀書不已人皆怪我何求我豈更求聞達日長聊
以銷憂

宋文鑑卷二十六